

ALLAH JAAFOOWO

1.
 1. Allah ngettaimi tagɗoyam hokki neema,
 2. Koo nde ɗuunoyi gedde taccay Karaama,
 3. Muyɗo suuroowo jaafotooɗo bo ɗunma,
 4. Allah yaafoowo yaafanam gedde jemma,
 5. Njafodaa gedde kuumi bo nder nyalawma.
2.
 1. Allah laamiido tagɗo en mardo laamu,
 2. On Ceniido mo innde muuɗum Salaamu,
 3. Kanko torotomi tornde bo dow dawaamu,
 4. Allah dumnoy salaatu kam he salaamu,
 5. Dow Muhammad he aalo'en jom karaama.
3.
 1. Alwaloo'en be Allah fu faadoriimi,
 2. Ngam mi yaare he dammugal mo doliimi,
 3. Ton to maako to njaami fu ummaniimi,
 4. Fiiji am fu Muhammadu kalfiniimi,
 5. Duuniya Barzakh kaza al-kiyaama.
4.
 1. Rar kaɗaafi ɗi nanmi ɗuudi fa karti,
 2. Non kaɗaafi ɗi ndarmi fa limki yawti,
 3. Non kaɗaafi ɗi mbolwumi ɗuudi fanti,
 4. Tuundi gedde fuɗi he am faa ni saati,
 5. Ay si daraja Muhammadu lootoyamma.
5.
 1. Yonki am waajibii bo yeebaniyam,
 2. Non haramji he ɗuudi go fagganiyam,
 3. Non bo hakkeji talaka go roondaniyam,
 4. Gedde am ɗee he ɗuudi fa ge'iliyam,
 5. Ay si daraja Muhammadu yoofoyamma.